

四庫全書

集部

欽定四庫全書

集部

牧庵集卷二十三

三五

詳校官監察御史臣曹坦

侍讀臣孫球覆勘

總校官舉人臣章維桓

校對官編修臣勵守謙

謄錄監生臣陳德彰

欽定四庫全書

牧庵集卷三十三

元 姚燧 撰

神道碑

真定新軍萬戶張公神道碑

公既卒於戍所衛州之明年而夫人亦卒其中子世其
真定等路新軍萬戶懷遠大將軍塔喇齊者將歸葬其
鄉先坐由是軍受湖廣省節度請告數數終以故事職

兵之臣無聽喪葬之文不得命乃曰父子之有在君臣
先其序則然未有責其能忠而禁其能孝者吾今何恤
俟舟二喪畢葬小從而奪虎節大置於理一惟命竟空
而還凡聞者莫不稱咨其能拔流俗善於子職無老少
一喙焉又曰公之遺烈今雖在人口耳不饒之石久或
遺忘來者或不聞託以計事至鄂持興國校官陳松年
之狀來請銘燧思昔戴荆憲由糾郡常德公時成是暇
則相過年已六十五修幹魁顏白鬚媚張虎目虎吻大

掌鉅踵望之森然氣欲搏人談其生平蹈危奮先大小
之戰數十嗚呼俾聞風聽鼓聲聞闐矢石餘軀老而不
憊者從可知哉則於公為知死今懷遠以佳公子侍傍
又為知生在古人皆當傷與弔者乃三復是狀嘗善松
年之能史惟末憾曰濟江將臣公者皆相而獨後公方
人固然於及天之厚公者則若未也蓋列聖之制職兵
民者死其子孫皆世之變自世祖奪職民者符節易其
故所死其子孫廢而不世惟職兵之臣萬夫千夫百夫

長者父死子繼世傳符節雖漢祖侯功臣之誓曰黃河如帶泰山如礪國以永存爰及苗裔何以尚諸其有相而兼將萬夫者詔俾自擇為之欲將棄相欲相棄將故其時有寧棄相而專將者豈不以相能振耀一時未若既將可傳子孫繹繹無究乎幸公未相相而亦蹈是轍矧他人之家世纔一人而懷遠元兄忠顯校尉管軍總把鑄由從公戰郢之通地獲於敵死之及子回世特陞千戶仲兄史閻亦懷遠大將軍戍瑞州等處萬戶獨一

門三人金符虎節千里連州相煥以華則天獨厚公者
豈不多且遐哉松年憾者恐復為公九原所幸也公諱
興祖姓張氏中山無極人曾大父大父不仕父林趙州
觀察使改節度判官丞相贈太慰史忠武公為萬夫日
隸其戲下太宗賜金符千戶老以公世從大將察罕征
淮南能以少兵擊破其軍虎頭關大將壯之賚銀為百
兩間巧於廷賜人馬介冑裝具宋開山南東道制閩於
襄陽反寇洛西殘盧氏永寧殺縛其守長憲宗詔以漢

地兵專受命世祖潛藩始置經畧司於汴屯田河南諸州以忠武為使忠武兄之子江漢大都督權為屯田總管萬戶宿重兵於鄧去襄不二百里兵信宿至城下鄧甃其城塞西南二門不開吾袍甲車道屬縣新野西港盡鈔于敵府摘公將兵三百騎與步半追之及之栲栳潭令騎負一步敵奪斧謀折馬足推步下騎為陳以待分騎為左右翼合擊敵錯愕無所於應盡殲之完得所鈔戰次馬嬰橫屍而顛復騰而上不知左股之折已

戰流血滿鞞裏創輿歸府迎賚銀為兩百錦二端曰未
足旌勞資市藥也後敵攻新野又大破之白河口中統
建元從史經畧樞授東川假以總管戍東安虎嘯一年
還鄧戍光化州漕安陽灘禽唐都統會中書左丞劉武
敏公極開用兵端大集天下兵圍襄陽從城鹿門江西
諸辟戍焦山敗宋援將張順江中殺溺過所當攻樊城
督造梯衝又戰江中火其戰艦斷襄陽援樊拔移攻襄
陽城東南當至元十年凡圍六年襄陽下攻陞總管再

官懷遠大將軍副萬戶明年詔故太傅布延以左丞相
贈開府儀同三司太保并國武宣公阿珍以平章左丞
相阿爾哈雅以右丞將大軍南浮漢而下下郢治漢東
築新郢漢西鎖戰艦兩城下夾以礮弩橫鐵絙江中大
軍擊拔郢北黃灣辟公實先登矢貫左股丞相手傅藥
拖舟入藤湖達漢越郢去從攻沙洋新城拔而殲之皆
負創先登矢又中額三捷功聞錫虎符從戰漢陽之沙
武口陽羅堡生獲其將鄭信矢汰左臂漢郢既下太傅

將大師右丞留後抽十六翼兵俾公帥師成漢陽公曰
吾戰是求而顧責守誰不能守則無所施吾所為矣右
丞則曰漢鄂乘輿所至視為衝地非材武足以先衆者
不可使撫安之不得已往戍聞荆閩遣安撫高世傑將
兵規復鄂從右丞逆擊走之荆江口世傑窮降詔移軍
江陵從功沙市因南風縱火樓柵皆然前登戰城上又
戰城中蹙血滯跌穢其軍江陵精銳於是馬盡安撫高
達以江陵降制置朱禛孫不出詔以世傑戰而後降非

其始志斬江陵市襖孫死京師猶没入妻子為官奴婢
而籍其財右丞功拜平章政事移軍潭州公為鄂公省
計事潭留使督攻西北凡三月破石心臺敵植木柵自
蔽或曰火之可入公曰火易沃滅柵心復植且吾師暴
處城下三月士咸伏兵立寐不如礮之使敵不能隊立
得廣途期盡十日內薄而登可以逞志平章是使策十
日公果前登樹旗牌牆諸軍呼聲動天地平章抃賀謂
諸將曰非用張某言而屬猶坐城下安撫李蒂殺妻子

火廨舍倉庫而死潰軍集城西陳江岸公涉淺方仰擊
飛石出城傷頰墜水面血及足出戰益疾竟走其軍功
聞進官安遠大將軍畧地衡永全桂陽諸州撫其來歸
而誅其弗率又從平章移軍靜江四十日拔之宋餘孽
益王爵人號年海中曰余復海嶺諸州相煽以叛潭之
群盜在在盜起平章謂公衡永全桂陽諸州與潭屬縣
汝昔畧定盜今復蔓汝其焚之殲文才諭七寨斬祁陽
令羅飛主常寧簿若必達磔周隆張虎新化降其黨蕭

隆劉監軍凡馘受僞命二千九百七人縛賊百五十人
安集劫贖二萬三千九百家常德路總管謀應僞先事
亦縛斬功聞進昭勇大將軍招討使監歸州位總管上
又移監常德仍招討位總管上西南夷為梗初詔征羅
氏鬼國會其既降未至而還後征亦奚卜薛降之以其
王阿利入覲賜衣服弓矢鞍勒公平生殺虎數十一日
遇虎一發而踣語其友曰生虎之髭剔齒疾可以已風
拔之虎怒爪韉裂賴其氣息垂盡不能傷足由是人名

公者則加殺虎於姓上至是以國言賜名巴圖尋詔萬戶各解使職故公罷招討惟以萬戶將真定新軍省檄戍衡茶陵耒陽常寧兼督平永寶慶武岡盜馘其跳梁者二百四十五而伍其汙民責使屯田故來者不失業者尚氣重諾剛不可以威強屈平章始終相從西南者見其不可衆直之醉或腰刀行酒平章避入後閣曰公醉矣戒左右善扶出遇契已者視意所欲與之不少愛焉其時諸將或集皆下之無有位其高者卒以元貞元

年乙未冬十有二月七日年七十五夫人卒以明年夏
四月十有七日年七十七葬以大德之元丁酉於其鄉
宋邨九男長忠顯次成瑞州萬戶次鵬翼僉嶺北湖南
道提刑按察司事次真定萬戶皆夫子李出餘皆幼女
女通常某五男孫長武略將軍世千戶者金符餘幼六
孫女亦幼銘曰

詩歌虎臣闕如虓虎不聞拔鬚視等塵土以之膳齊秉
旄遐荒宣一西南百年未疆荊州之域連城數十襄陽

武昌兵及江陵長沙桂林取皆以兵餘郡傳檄反虜起
伏介胄九年晝夜弗釋登危摧完戰必前列荆城底寧
移兵夷洞來其降王檠瓠遺種矢石癡躬元戎奏功大
帝一聞一官以庸迨其入覲嘉名天訓乃省在筭華其
衣裳又勅尚力業矢象房魚服鞬弓雕鞍全勒歸馬蹕
蹕亦爛其飾雖古方伯得專征伐錫命之多將不是越
憲憲其勞授報既多蓋棺龍光遺脣尚荷二長萬夫一
千夫長令代一門三將誰兩矧是萬夫二戍燉煌一殘

闔波鯨海是航雖基公陞亦遐以勩無羞前人亦曰克
世兩間之堅莫石惟年可磨不磷載銘以傳

故從事郎真州路總管府經歷呂君神道碑銘并
序

大德十有一年冬皇上淵龍遣正字呂洙以宮賓起燧
於郢相與舟行浮漢而江明年至大之元始識從仕君
於儀真傾蓋如素留止旬日禮甚恭情甚浹也又明年
從仕卒洙自京師再赴還持集賢待制趙抃之狀以銘

墓為託嗚呼禮曰知生而不知死弔而不傷知死而不
知生傷而不弔在余為知父於死知子於生可容讓為
君諱郁文伯文姓呂氏相之安陽輔巖人葬地與宋相
魏國韓公冢相邇世傳為蒙正文穆諸孫以遭宋靖康
金貞祐河朔干戈弗靖者皆二十年生齒耗亡十七何
譜牒之能存不可推采其次惟地江南今居襄陽者其
系最完蓋文穆而上溫鎮頊韜夢奇龜圖六世下文穆
者皆二名簡迺同伴希同夫問同之中同大與祖七世

合之為十三世祖下一傳素矣微矣東萊諸孫必續系
焉今不得見文穆葬洛陽文文靖公夷簡葬鄭蒙休居
壽州大寧大防在藍田豈居相者亦以仕家焉至今鄉
人以韓呂二姓為是邦之望皆優裕以治時肇置江南
諸道提刑鄂屯實魯為淮西憲副按行所部凡他路幕
僚之不職者多被汰黜獨以儀真真軍事既集學校修舉
寇攘屏迹鄉師里胥推擇有倫特加賞異白之行巡省
惟得斯人力為薦汲將加峻擢後以僧格領尚書丞相

勢焯薰天懼抑其志貽悔後來歸養寡親築室東湖之
干名以致樂寧與細民逐利什一為甘脆資有純孝譽
或勸復仕則搖首不對賓至則封羊酤酒相與為樂以
不足日為事計歲有饒惠及窮匱丙午江淮大饑乃損
中統褚泉為千者踰十萬州閭賴以不殍死者為口不
可殫紀惟不置田於郊曰吾寓公也有是則思子孫媿
以為首忘歸君鄉遺洙從張導江達善學蓋文公之婿
黃勉齋饒雙峯師事焉導江則受學雙峯觀其必求文

公正脉名子以洙沂汶皆取魯國諸川明所願則學孔子末為洹示不忘父母之邦皆可見其為心不苟操履之純也卒以八月二十日卒六十七歸葬其鄉大考珍在金同知渾源州考忠登貞祐進士第監稅於衛金亡反其鄉晦德以卒妣夫人李亦儒家讀書知文於老佛學亦造其微監稅卒薦君於學太夫人力焉妻韓氏亦衛國胤孫克勤治內有惠及小星之譽前公一年卒洙克佩父師之訓夫豈無自而然哉故為詳此使有傍韓

呂合族焉君賦資強敏而嗜學志為世用經史餘力周覽洽記刑書莫數尤所精邃蒞仕山東道提刑書史詰姦明允雖文無咎宋平轉兩淮鹽漕書史是時江淮新國初為規制抽戶為工散弊為本商賈雲集舟楫溯江遠及長沙法簡政平取不剝不羨不岡山賦入其時上計於朝授從仕郎兩淮都漕經歷方數千里之事藜歸是幕力所得為若善御之得輕車熟路便施弊祛功倍曩昔會東征倭行省責治軍旅伐材造舟鍛刀餽粟與

夫役民為嚮師火長百需之來其急雷電以君才優治
必必善撥劇乃轉為真州路總管府經歷真州去東征
行省最邇未下他州而先及者公以淵龍舊臣或踰分
干時其乘雲雷以依日月不難也惟揆道循序表表中
行亦時才之可虞者男孫一人女孫有歸與在室者如
干人銘曰

丞相之貴禮絕百寮平章拜之猶體不搖惟於命官不
致堂帖必謹具階准勅以牒蓋尊名爵亦使其人知為

王臣自重其身品雖從事居下之上所職則要淮漕幕
長者煮海為鹽立制禁姦通商惠民醴利丘山控地之要
亘數千里令速責成效於屈指隨以征倭改幕儀真蕞
爾一州行省日親軍興百需自近而賦其集有方益爾
暇豫餘力及州役均校修逋歸犴清田無萊疇為部使
者收其德美上功於臺將置風紀時秉國鈞虐炤爍天
故棄休居明哲身全事親致樂讀書教子贏資州閭荒
歲救死在官與去為惠則邠矧子而才家聲克荷太行

卷二十三
之東輔巖之里碣以表阡華爾桑梓

皇元故懷遠大將軍同知廣東道宣慰司事王公

神道碑銘并序

三十一年將仕郎同知新州事王弼練服持一書過燧
龍興客舍拜言曰此弼先人懷遠大將軍同知廣東道
宣慰司事出處大凡與受代所由也中具歲上戰功自
生二十五年世吾祖長千夫戍膠州以及至元三十年
年五十六六月四日卒廣州凡在官三十二年膠州內

地無事戰禦自四年用兵襄陽十三年宋亡與宋臣戰
未嘗日釋介冑宋亡至十六年與兩王戰未嘗月釋介
冑南海平矣與反虜劇賊戰未嘗歲釋介冑合是三者
之戰凡二十七年中十八年三入廣鳴呼勞矣而官已
是年以是命也令將以某歲月日還葬鄉霸之大城孟
邛先塋得善史者銘其碑我先人將不恨其無聞於地
上且懷德地下也敢以哀鳴公大叅龍州李公亦曰是
公以鎮撫事先武愍公於帥府先公至地亦至焉者其

事然乃序之曰王氏其籍大城者不可世求曾若若祖皆失其諱祖令大城考英故叅張公榮實所將水軍百夫長世祖錄其從濟江功賜銀符長升千夫李壇反戰死濟南二子守信祿公以死事臣子之長故世銀符長千夫戍膠州從禁夾寨襄陽戰疾力功換金符登最樊之外鄂省旌楮緡百戰江中斷橫江鐵絙苗捷獲船三十艘拔樊生致都統徐麟省又旌楮緡百從今太傅南代戰最郢之柳林署省鎮撫攻新城沙洋獲船二艘戰

夏貴鄂之陽邏獲船二艘首功三百錫白金二百兩再
以都鎮撫從都元帥府定江西諸州授宣武將軍管軍
總管於時宋亡其將相更立並衛兩王故廣東不下從
破韶州又敗方安撫廣之石門授明威將軍從擊文天
祥於贛之興國之空坑止其妻子散降其衆略盡禽前
鋒趙賞帥府改行省從右相至廣張經略集戰艦二千
海珠寺擊大破之獲其艦百八十斬首不及級計再授
明威將軍衛王死入覲宣武將軍虎符還戍廣取葛岬

洞崖石砦殲李梓發兵南安別降林桂芳昆弟新會處
南海軍三千人生致其帥潘舍人歐將軍偽署置官自
王清遠遣馬帥陸徐相襲廣州廣州皆擊破之斬三人
及其軍千平十數壁歐走如新會合黎德德已集船至
七千艘衆號二十萬其別將吳林以八百艘圍馮邨先
是公嘗課工於軍伐材於山不資公帑為戰艦三百五
十烏船五十載是戰艦德林衆大潰沈死海洋生致黎
德歐王與偽都督丞相兵馬鈐轄二十四人皆磔之椎

其偽璽召入賜衣服弓矢鞍勒加懷遠大將軍同知廣
廣東宣慰司事三敗東莞盜張強三千餘人首功三百
歸所掠人畜其主廣盜少戢其使入覲恐公受代去歸
預乞尚書宜留再授懷遠大將軍同知廣東道宣慰司
事降循盜古尾郎長樂自宋亡十年招不能至者版賴
勝立興寧廢縣以宅流民又斬汀盜轉入梅循者鍾明
亮官并吳禽三首而壞其郡最斬盜為起二十九二百
七十一人今著其尤魁驍者皆鄰省連兵頻年不能加

誅公必取之廣之屬州皆山險不可馬至梯崖絕谷逐
索水則乘鳥船遊擊之不盡不已其為什為伍殺人以
剽財之倫皆削棄凡是諸盜名若可易而顧誠難功至
今有未靖者老將論者曰大夫死登陴陷陳猶足為名
澤及吾妻子今橫尸草竊手與經溝瀆不異亦足嗟哉
此觀望不屑蔓盜所以也反究公心忠勞如何廣之屬
州若士與民及聞今伐爭狀於宣慰廉訪兩司功其盜
弭願留公使以殿南荒行省以聞代踰一時而卒惜也

夫人石氏子三人弼也知彰其親者非文不遠亦既克
子矣餘未名男女孫皆一人幼甥有戴德仁者舟從至
南康燧書以還可尚矣銘曰

北海生濱卒墮魚溟萬里歸棺低昂絳旌維之南溟其
險不測其北嶺嶠群盜攸宅嶺嶠何如峻削劇空羣盜
利之自王自公凡在勝國敗日難令與今吾元跳踉豪
勁公有砧斧腰領汝膏十八年中無有幸逃或曰公哉
始勞襄漢終覆武庚椒洋無畔不是之書遂盜諄諄大

棄錄徵奚示後人曰訖炎趙猶兩孽噓爾爾死灰乍然
已息公與樹功帥從相從貪人所同公差有躬維祝融
墟實漢南越大兵艱施小兵弗驚勦無賊良公功之私
廣人戶知今思永悲白潛昭幽丞太史職載銘不亡有
穹斯石

有元故少中大夫淮安路總管兼府尹兼管內勸
農事高公神道碑銘并序

至大之元高氏子璉手其家乘中載教孔孟三族楊潛

齊庸孫洵陽希獻太子諭德蕭勤齋蚪為其考少中公
之序之行狀埋銘丐太史公牛馬走表其墳道所未識
者獨孫洵陽若潛齋勤齋皆走所友其文自足昭令而
信後而走綴言其末無乃顧為先德累歎以故久未操
觚後思共公都漕河南我先世父少師文獻公行省於
汴公來受約束於下執事走嘗還贄焉再都漕闕中走
時秦邸文學相接之數數又非昔一還者矧聞璉也嘗
師事同門人劉憲副存齋季偉曰善篤學力行者可虛

其請耶遂序之公世平山人諱良弼字輔之祖俊民妣
吳君二子進林進金鎮國大將軍守滑倅太宗大封同
姓國母弟睿宗真定享國不延莊聖太后主是分邑置
規運庫林為之使其歲上供子息蕃多而家亦殷昌姚
門君三子公為之冢就傳讀書端重異羣兒會真定火
延燒千家言之庫使君是灾幸不及吾家吾力不可盡
發財以賑君聞擊節曰及物之心見於髻稚他日大吾
門者將由是而行如其言既冠宿衛世祖潛藩後正大

位盡付全趙財賦聽其綱紀而歲登贏時天下困於鈞
稽公以全趙獨遺入請亦置計局帝曰世所困者汝獨
求之可灼其無有斯冒其間至元改之明年官奉議大
夫同知南京都漕錫之金符六年改使河南拘權稅課
所其年仍河南升都運使他道為使惟知徼寵專利賊
下罔上以自私盈路怨咨莫之省恤獨公軫歲旱荒發
廩下估市粟以濟其饑大為醜祠以穰蝗孽斯皆職民
者宜為而治賦臣願先之俄然天若悔禍兩澍蝗死人

則詩而歌之冀采風謠者取上聞也又以用兵襄陽賦
河北諸路之民轉漕人畜勞斃而粟至者亦絕續不時
公請增直以糴則人趨利自至以賦民漕功將倍蓰省
行其策由是軍中困廩充溢或露積不垣滿秩官朝請
知鳳翔府事治民安思永利之乃倡民導汧水起遙望
盡閣底五十里再冬而成溉田三千畝水輪十七民之
圃蔬園藥者又井井乎其濱岐人惠之姓為高渠僉憲
劉仲修按行其地賦詩勒石紀功安西王開國之三年

詔許凡官闕中者職不職聽其承制遷黜由是升中順
同知陝西都漕其使郭琮恃獲上且阿中盜殺臣雲
巴勒肆為非法公與連署凡賊國病民賈禍者縮手避
之琮敗獨無所污朝廷恐其屬偶逃連坐遣使深贖者
數輩鈎稽簿書於公無絲髮得遂家居教子樂賓或縱
遊山水勝地以自適二十有四年制下其家起以少中
大夫總管淮安是郡前以征倭責治海艦歲市財萬富
商恒大其直通有司分入其利積材已十三萬下車吏

又發郡帑四十萬緡如歲例續市蹟署公曰已市者足
支一紀復市何為下吏於理飛書上列以為徒爾耗蠹
縣官富商恐壞其姦夜持五萬緡以禱公曰若欲如他
人貨取吾耶吾不能同汝為盜叱去無幾時行省報竟
下如數收市公歎曰吾言不効於是商戶位何為一鬱
發疾以卒寶歲丁亥二月二十有一日也年六十有六
公軀幹魁頎風度凝遠望之已知其為不人下者矧其
秉德易直剛而不競柔而不撓友善日親惡不急去真

善應世務者元配夫人刑君前公卒繼配夫人董君後
公十年卒姻里皆師其婦道母儀五子琬璠珪璉瑾琬
由任子尹宜陽後公三年卒璠中珪以海船船總管戰
沒交趾三女歸成都三務提領閩郁湖廣行省郎中郭
孝華州判官魏餘慶男孫一思誠女三歸王秉餘幼曾
孫男三女二皆益幼公初葬真定後十九年子璉以公
生樂家秦沒而魂遊遠也徙之長安縣華林鄉祔兩夫
人而琬璠皆從定新兆公弟良輔良輔三子璋珂瑄居

汴佐二子瓘玠居其鄉銘曰

姜齊之苗食采於高地以姓之其來也遙其系其傳文字無紀今其可推纔祖焉爾全趙全湯千里其疆誰之國之繫我睿皇考居其間斗食自晦入出金粟克當其會再傳而公世皇飛龍

牧庵集卷二十三

欽定四庫全書

牧庵集卷二十四

元 姚燧 撰

神道碑

武略將軍知弘州程公神道碑

由程氏世為太原初縣人燧考歐陽公表唐相系曰程
出風姓顓頊生稱稱生老童老童生重黎其後世掌天
地之官裔孫封程爵伯洛陽上程聚則其地也至周休

父失其官守以諸侯入為王司馬及銘文簡公琳碑則云莫盛于唐宗分為七廣平中山濟陽靈洗其三則皆祖魏安鄉侯昱而系表皆無是言惟昇上三四世而止豈今居太原初者或廣平中山分歟其可系則自其高大父主祁簿政生曾大父禮武科取官忠翊郎至右武大夫守隆州冒陳金兵以歿宋愍節死賜錢百萬歸葬其鄉大父天祐醫以自業卒葬文水考達以太祖建龍旗九旂即位之年丙寅至戊寅兵金之年為十三年年

二十餘與兄通弟進倡豪傑來歸完保其鄉為提控為
監軍鎮撫軍民都彈壓管民總管銀符甲午金亡之明
年還鄉民五百亦占七籍詔易金符位總管上發平陽
河中京兆民二千屯田鳳翔實僑客其地城中猶荒錯
荆棘逐虎狼則田疇非立芟舍伐株楨芟蒿萊不可以
入錢鑄以觀銍艾戛戛其薶哉矧西則秦鞏未臣行金
正朔南大散闕距宗百里北山飢盜縱橫日夕相寇殺
丙申又為征蜀所塗師旅去來館餽之須十以率之屯

供億七鳳翔纔三後鳳翔民稍集資屯猶六焉為之七年當歲壬寅以終其賢其能其勤其勞有盧昭文摯墓碑言公諱介福字伯祥故事父嗣子得嗣為歲辛亥宋四川制使余玠潛遣偏裨火絕棧道木閣身將大軍攻圍興元城方孤圍公將屯兵五百從都元帥都爾蘇入援及絕無從得塗值三人自圍所亡歸許賁其死令導由他山刊木出陳倉玠以為自天而下焚圍宵遁其年憲宗即位凡中土列聖符節告身盡收之官明年入覲

還金符仍位總管上屯田鳳翔制許專殺有王姓民歐
兄至死即就逮其親請鄉鄰善公者懷白金二鎰來貨
曰死非他人吾長子也今又以季子償死吾誰與為養
惟哀而金之公却金曉曰虎狼獸耳父子兄弟且不相
噬人而賦殺同氣其不仁也暴甚虎狼此而不誅何以
正是邦之數敗天倫者竟尸之市尋岐雍民家奴皆蜀
俘百十為曹相煽亡歸公悉之還朝廷聞之率以為反
遣持齋齋來按事連其主將盡殲之公曰民奴羣逃主

何與知惟當誰首亂者由是惟誅七人孟待制嘉之因
扁其堂曰明恕戊午憲宗進討西川乘輿入由鳳翔多
其津梁館餽康餽修治豐潔賜金幣五白金為兩百五
十世祖立極中統庚申收上符節告身如先朝以前屢
入覲潛藩熟公還金符至元四年丁卯以平陽河中屯
民為軍假公子松長千夫將戍成都其還鄉民五百八
傳官公武略將軍知弘州下車渠尋乾水灌田五十里
新州廨以示安榮一刳夙昔苛簡之弊歲饑封民所食

木膚草實上之中書得發廩以贍械素豪猾之于治以
病民者于市懲吏擢曹徵君子汝弼教授以師是邦使
士知學其古人所謂糾姦示惡流恩褒善者類歟十年
四川上所戰功制問故符安在對以弘州仍佩制解博
松滿秩還岐二十有六年己丑年六十七冬雨水水羣
鳥噪集庭樹三日公弗善之覽鏡入奩前諸子訓曰吾
平生無他長人惟俯仰無作愧天人耳若曹可罵學自
脩則在家在邦不患無孝忠之聞也惟求善惡在己有

無無以人過于毀譽而輕愠易善語訖而卒實十一月
二十一日也踰月從葬于其考鳳翔之召亭鄉兆次兩
夫人皆前卒謝君四十一年富察君二年四子長松次
檜八蕃副都元帥虎符皆不祿悌彬業儒孫五人萬里
秦山殤壽山業儒文演陝西萬戶虎狼文饒未仕女十
皆歸名族其天質仁厚剛方孝友明信哀孤敦宗民奴
禮士者有陝西賈提學其墓誌言銘曰

猗歟將軍賴基父勲田岐雍郊干耦其耘人初小之治

寄是府勢若異然此客爾主後一歲中校其賦踰爾財
四三此六七居無事而農我父我銓警將一旅從寇入
出憲廟兵宋師由袞斜百須餽供應求吐嗟帝用嘉止
幣金實匪其為龍光疇與儔比于後世皇詔其子松將
屯千夫戍鄰祚叩其半屯民歧雍之界移公刺弘足乃
騰驥乃渠桑乾膏潤孔多履道以仁越度用苛視民之
飢猶已紆臂亟請于朝發廩以食滿秩養安十五餘年
靈烏告凶得氣之先觀古史臣為人紀善雖一行言亦

取立傳志在行後尚鑒用勸子孝孫慈乃祖考思惟懼
平昔有美棄遺託諸能言金石昭垂走非其人彬爾來
即拜手過求先德為述誅蛇而章其言洋洋匪資礎龜
疇遠闡揚

譚公神道碑

譚在周千七百國之一子爵幽王之譚大夫衛碩人之
私譚公皆其遺苗後世子孫遂以國姓史代有人其居
德興之懷來高祖而上不得其世曾祖信金鎮防壽州

千夫長祖伯全家累千金父資榮以徇北功皇元帥左
都監虎符寄治交城遂令其縣削平盜賊賢士逃亂者
多往為依公生以歲戊寅髫年入學穎慧彊敏拔異羣
兒成人兆緒嶷嶷則見十五綜經緯史講貫精熟會課
朔望每魁諸生為交牧廬帥所竒以女妻焉軍中得書
則馳送之故其家積多至萬卷國初為制皆世其官父
死子繼兄終弟及或父兄存將傳子弟者亦惟命故考
府君以元帥左郎監交城令推其弟資用卒公以嫡長

嗣為十九年矣太宗之八年丙申州縣守令上皆置監
動惟國言公不能也而受成說譯人盧其見欺乃私與
善國言者遊目薰而月聒之滿歲而悉能精曉他日郡
議不資用譯應務無滯人悉異其不學而至朝廷置斷
事官于燕曰司瓊林園之臺人人則曰行臺府檄公往
計事歸請省諸工料費橫取民者府僚便之舊文谷水
分溉交城為平牧郭帥所遏專利其縣民累訟之終不
見直躬造大府爭之郭帥少公恃為父執至或帥詬公

不為報惟理譬折彼遂噤屈至今其水縣蒙其利杖部
民持吏短長恣為非法者幾死民患其威俄入覲因中
書耶律公面陳初乙未料民州縣率以無產僑客入籍
用示其庶及賦丁悉避逃徒責徵實存官無所取稱貸
賈胡困不能償迫改立約以子為母譬以孖生孖牛十
年千頭滋息日增帝為哀之制許贖其逋縣無鈎見民
公私之負三年勿徵子母對止亡民能歸其復三年縣
境大甦而鄰民曰吾獨不居交城耶州縣守令益害其

能請督一府遠輸之糧于平陽及至又移輸京兆仍守
其出比盡而返數年由是縣民困劇隣矣憲宗壬子復
大料民公削其逃徙其兼貧弱雖損戶數故是縣差不
艱窘歲甲寅世祖淵龍平大理還始入見嘉其舉趾疑
重出話慎詳留居藩府官而不名以其弟山阜代為縣
遣通臣出使必以公偕先是分封世祖以京兆由戶寡
益以懷孟且詔總天下之兵遂置經略司于河南宣慰
司從宜所于關西行部于秦州漕運司于衛安撫司于

刑盡遣諸軍屯田戍邊首淮尾蜀以休秋收冬士馬在
來之勞東西數千里道不拾遺中侯屯庶翕然歸心歲
丁巳宗親問之遂解兵柄他王遣阿勒達爾至京兆大
集汴蜀兵民之官下及管庫征商之吏皆入計局為條
百四十二文致多方且曉衆曰惟劉萬戶史萬戶兩人
罪請于朝蓋謂忠順公丞相忠武兩公也自餘我到專
殺虐焰薰天多迫人于死世祖遣庫濟青左丞與公來
臨無與鈎考而彌縫其間時通動息藩府會明年世皇

身至帝所命下而事始緩猶杖兵民諸官凡昔所置諸
司皆廢公歸丁妣郝太夫人艱藩府奪哀起之世祖始
分兵南征俾公治懷歲旱復鑿唐溫渠引沁水河南諸
縣中統建元制褒其賦性寬和練習政事以為懷孟路
總管明年入覲賜金符四年換虎符訟隨日決魯不留
獄教民植業桑疇麥陂稻塍艾湖果園苧區水輪步船
無有遺利或用致饒民其藏獲侯克寬孫宥等家男女
數十人引蕭讓為府史升知事積官運使按察使至元

二年罷世侯省懷孟衛輝兩總管入彰德以公為同知
無幾時官嘉議遷河南路總管兼府尹明年奔元帥府
君喪交城中書不聽終制迫懷泣職澀水壘石為岸梁
木其上歲易腐敗規為樓十二楹覆之慮其財擅取帑
力輕用民得請戶曹而始究工上下列肆月收傭直資
府公須參政楊公紀績于碑官少中平灤路總管既至
疾歸七年散階例降二等與職上下官奉議司農少卿
尋進嘉議京兆總管兼府尹者一年改陝西四川道提

刑按察使當按行四川以邊方軍政多所闕略未可以內地文法遽繩脩舉大綱而止州寄府史坐贓污者以始犯罪皆輕平下令治事之餘使學官聚為講解期通一經庶少變其筐篋刀筆之習漸摩禮義則恥貪免而不或蹈時詔禁有妻娶妻乃建言不孝有三無後為大世德下衰婦人以悍妬成俗既無子又以是許制其夫將遏絕苗嗣曾不省恤請自今男子四十無子聽其娶妾中書是之遍示天下十年中書左丞谷順時為宋帥

嘉定入寇大敗僉省嚴忠範于成都沙坎入其郭我師
退保于成工械忠範至都俾公代為僉省至則瘞其暴
骸完其焚屋賑其飢貧集其流亡撫定一年西南夷羅
羅斯內附上以文武兼資可使鎮撫新國以為副都元
帥同知宣慰使還京兆治裝或說蠻夷無親不常叛服
宜以老疾辭行公曰受國厚恩圖報無所以皇上之威
德遠被何往不可何私自幸其安乎就死其所懷人德
我馬革裹骨歸寔是焉志願畢矣遂行未至行橐盡為

河西所劫事聞上慰安之再為降制及軍中所須至其境方輸皇元同仁不間遠邇持置大帥安集招懷以捍外侮非利徵求賸削汝也國人大悅而公以不能風土竟疾卒至元己亥九月二十有七日也年五十八門壻李某護其喪歸子克脩迎之中塗號慟屢絕懷路之民哭柩致奠者將三百里以明年某月日葬河內某地後踰三紀公之孫質拜而言曰君及知先祖且與先人同事許文正公求可銘先祖碑者舍君焉將誰託筆燧曰

嗚呼公奉命始至秦于時識之其後尹洛燧時家洛公
遊處必見召嘗謂為忘年友雖辭而不敢居抑不可不
謂之知己于其平生若可槩焉子之言曰惟仁者能好
人能惡人蓋先師以初入見潛藩之年驛召至秦後四
年公使至見其道德之容聞其仁義之言考其卓絕之
行憂世之志樂天之心出謂人曰今顏子也先師還懷
公為之收以求言焉則謂之曰學者或滯于形迹而不
適用中理合而一之斯可謂善學者猶導公以用世之

方身親接久而始示以性理之妙而操脩之又使克脩盡弃其學而事之其能好人也如何默爾吉為監于懷以暴疾跋扈名聞一時同列少逆其意或詬詈侵辱不異僕隸公與處八年細故則讓事或害政則誠意馴導以理使孚信之能改而止惟遠以不惡而嚴又游顯代張左丞宣撫大名為諸路總管求金符秦已上公言之中書辭不受命曰聖上不識譚澄耶為顯所舉省為去之其能好人比類亦庶幾其仁者歟太師趙國劉文正

公論天下仁牧得邢之張芸夫懷之譚彥清何憂不治
哉先師亦言譚侯辭氣溫雅雍容樂易達時識治足畏
服人其為兩公推與華袞之褒何以尚之夫人盧氏勤
儉惠和不侈既責能以身率不輟婦功故婢數千指約
束如一壺範之言所至化之克脩事裕皇出為江南湖
北河南北陝西漢中三道提刑按察使秉受懿美得之
天問學脩為受之師忠信豈弟臨政與人皆踐其父武
女九人適淮東宣慰使傅奕延川令李某湖南書史石

某江南推稅使賈時益汾州萬戶子杜某杭州總管子
揚某澧州總管子鄂屯某參政子盧某交城以次官子
王某男孫三人忠尹大名之南樂質宿衛成廟已銓未
除文庶未仕女孫七人適湖廣省員外郎表景韓知陵
州杜明耶律太傅濮國公孫某東昌總管之孫宿衛成
廟許諠宣慰使子傅蔓文某實某銘曰

有翼其恭有溫其雍有訥其言有裕其容人有其一足
曰善士矧公兼之宜克用世魯昭十九猶有童心公于

其時帥政已臨視民之傷猶已致者奔走不皇說上教
下事太定憲由邈皇居與率土臣衆以視諸入侍大帝
藩府帷幄而日迺與俊義道擢凡厥大猷亦與有聞權
臣肆虐恃解其紛大帝南征歸正天統于懷于洛于灤
于雍于是有衆迭司牧之惠積寵嘉虎節陸離進之風
紀詰姦秦蜀惟政以仁不一文律嘉帥縱兵入寇成都
劉吾人民火其外郭奪嚴諸侯于彼僉省以公代往責
使撫定安鎮一年移師西戎皇威甫張而遙告凶最公

之仕歷年四十其二十年為帝賞識矧其有子官風紀
三其取于天而得已貪走賦是詩鏡石墳道期爾後昆
百世是保

轉運鹽使曹公神道碑

維曹肇國則自文王子振鐸以武王弟故與唐康管蔡
霍屬以別之鈞曰叔春秋十二國曹猶存其後子孫雖
散之四方亦皆曰吾先人顯諸侯捨姬氏惟國姓至參
以沛吏佐高帝興漢功侯平陽國或絕或續魏文帝丕

篡漢以有中土者凡四傳四十六年自是聞人史不絕
書至金初曾祖儀貫籍睢之考城以明罰執法為郡功
曹生蔚解試魁開封生鸞以材武受知皇元帥劉公引
為天下規運提舉妣夫人赫舍哩氏金源貴族生公諱
世貴字仲明由翰林國史院書寫為元帥府提控初高
麗自太祖世納款而國王穆呼哩方總兵歲東征不休
虔劉人民而滅獲其子女高麗患之棄王城徙其民江
華島世祖哀其首服為罷歲征諭使復王城今瀋王之

祖惑其令功林演之說仍安其所不以時徙帝怒命嗣國王塔納格爾兵其界遣平章政事趙璧行政東省公為行省宣使入與演與同惡豎惟茂禮書宋訟禮侍郎洪柰陳兵以逆公叱責曰汝海邦小夷敢以威脅天子之使則反矣戮十餘人縛演致闕國王導之入覲帝嘉其忠敕授忠翊校尉曹之城武令有惠其民勒石頌之凡三遷皆同知劇郡吉州歲荒發廩以振餓羸隆興羣盜據華洞數調官軍討不能平遣公諭招之悉棄險來

下皆齒平民建康去以母喪會庭議凡前峻官者例陞
之改溫之治中以未終祥禫辭明年官朝列福建閩海
道提刑按察副使職乎民者進為風紀非聞望出常調
者憲臺不輕以畀至則紕閩省平章默勒賊民蠹政下
詔誅之彼其同列大為震肅滿秩官中順遷興化路總
管兼管內勸農事凡民為羣盜鍾明亮劫脅汚染進討
將士取而奴者無慮千人皆汰之遷福建都轉運鹽使
未上而卒竇大德六年六月二十有九日也年六十一

葬太平之須城登賢鄉夫人趙氏南京提舉趙晉之女
妻道母儀姻里範之五子定國尹江陰州兼勸農事靖
國同武昌等處種茶提舉皆夫人出次室葛正國安國
輔國皆葛出方勵學女孫三人銘曰

率土之逖將帥侯牧有沒其齒天威不覲公一布衣從
省東征問罪高麗負羈以行檄行浮海徙江華島敢拒
為亂魁脅縛討王孫導之入告為猷甚為帝嘉邑令用
優既試牛刀易猛以惠尋峻其階告洪昇倅吉拯歲荒

洪咨諭降持憲于閩渠允斧允為牧興化凡寇滋蔓波
汙平民悉賴以澣轉而閩漕鹺利是專甲子方周白日
遽捐平昔履歷盡萃乎此在邦必聞可無愧已而所未
白在家亦聞衰俗滔滔在官幸身親未卒哭期月已出
王事是從笑言自若公則異諸昇護輜車改溫又辭練
服未除若是自致庶古少跂化民興行足禪至治須鄉
登賢而祖有所碑以表之庸信其傳

少中大夫孫公神道碑

至元二十有三年燧以直學士召至翰林孫公時為閩省郎中數千里狀其考盧川府君之行將託之石見求既為銘其墳道矣大德四年為懷孟總管且卒顧言其子壻郭忠恕曰死必求姚翰學銘吾碑至大二年燧方承旨翰林忠恕其時已為宗正府郎中始致是婦翁之命嗚呼何公區區不鄙余言若是之不忘也公諱顯字榮甫其鄉望遷徙考妣年葬兄姪名爵前述悉之公幼學既長以其家隸兵籍歲從大將南征世祖立極置江

淮江漢兩大都督東則李璫開閩益都西則史權開閩
鄧州與宋揚州襄陽兩制帥掎角及璫誅廢督府皆為
統軍至元五年大集天下兵圍襄陽起本平宋八年敕
統軍駐淮北實制下流西擾之兵明年改行樞密院者
二年改行中書省于淮之西十年襄陽下廢省復行院
明年丞相巴延行中書省將大軍濟江又廢院與是省
合公以從戎捍敵應變倉卒益示暇豫未嘗窘錯故由
書吏至今史數年不調宋亡明年積是勞動官中順大

夫遙授知英德府同知太平路總管府事又明年改江西行省郎中宋餘孽兩王盜據廣海遣將給餽凡其征需動咨幕畫隨亦殄平十八年官少中同知荆湖北道宣慰司事朝廷遣使鈎考錢穀及侵牟者遂大徵集諸道官吏無慮千數于鄂省責公主計局其使善煩其令為藁甫定則一易之傍求多塗約束計吏于行苞直公衆辯曰冊已具矣何至衆多為是持久不絕之務乎有絲髮遺罪請身任使為之止其不屈威暴如此乃歸計吏二十三年廷

議以平南國升秩過峻例他公為朝列遷福建行省郎中以犯法匿楮緡十三萬定能正而不阿卒無所染明年以僧格為丞相為尚書省中書六曹悉以歸之而鈞考尤酷省臣而下或杖辱而閩中獨輕平未嘗若浙省迫人于死者南雄械賊百餘人為草竊者當死公讞之惟刑三十人他悉縱遣安溪賊連十五砦為寇公諭下之省議苟下惟罪首惡至是下者數千人衆欲盡屠壯士分有其子女公拔劍止曰省議云何敢掠取者論如律惟磔首惡一人大德

二年復少中大夫懷孟路總管魚諸軍鄂囉魚管內勸農事民蒙其利者惟竹始竹之徵利財自戊戌宣課所惟在洛西懷與輝舊皆民產由馮德用為河南漕長以兩郡之竹妨其課利請官有之制國用司為奏可而禁之法密雖其故主輒取一箇亦坐以盜數其節為布罰園傍之田民耦耕侵犯而出亦指為罪民甚害之官復竭園伐取竹日益耗而課入不除公策千部請令故主興隣地護守無禁斬伐惟責輸賦是亦復民產之漸也

符下從之今鬱為茂草譙樓廟學有老弊者無不經理
新完諸王妃主輕郡賦民木席為屋絡綵周之晝食夜
息各異為所或前期一月具而不至民又守視不去去
又官吏規取其物無所于訴公至製卉布為大幕容倍
百人可以離合卷舒既便以輕載以十車之力送往迎
來無不至所皆前政未為者病革猶卧治事卒于郡治
仰菴堂之別室是年秋九月九日也年六十一夫人程
卒以至元十八年繼夫人楊卒以二十有三年今夫人

李嘗割股肉羹進覲已其疾斂則斷髮納柩中示與同穴子五二十有七年長某舟死江中次某以任子為單州判官餘未仕女四長程出郭宗正妻今寡次李出適智某餘幼銘曰

崧高詩言峻極于天維嶽降神王不時巡而公之先世家其下其仕其隱譜無究者及公之生珥筆從戎志期振拔以立事功周旋統軍行省行院雖屢易至為史不廢以才見留謀資其優逮夫濟江勞力大酬英德太平

遙領知倅官之中順副以金端尋于江西長省幕僚進
而少中其秩益起轉而荆南同知宣閩奔走聽命踰十
名郡例阨始躋朝列稍卑于吳于閩省幕再為後移內
地理問汴省復其少中總管懷蓋平生履歷其止于斯
治兵蒞民何事不為為則事治有譽無刺其于為臣亦
盡其義其所卒地郡堂仰崧何公于崧生彼此終豈人
之為造物者意歸安崧丘後昆以利

勸農使陳公夫夫李君神道碑

少中大夫嶺北湖南道肅政廉訪使陳元覲語其妣夫人平生于其友姚燧曰河東李氏有開國于金為金吾衛上將軍者子孫雖世搢紳多顯人人不目之惟上本其先曰李金吾云夫人則其諸孫陝令欽若之女先君勸農使將授室祖考妣規措公潁川郡君審于采擇聞夫人淑姿懿行布幣聘之夫人既廟見吾陳氏世緒絕遠族大以蕃先君上有參議提學奉職三兄善于閨壺脩職謹事舅姑孝之娣如友之姻戚睦之而僕妾恩之

咸曰非漸涵姆訓有素不若是以履度循法也歲壬辰規措卒天兵劄金河南獨奉職以詔使死亂他族皆完自洛之西徙家解梁夙所居積蕩無遺矣會歲大荒夫人擷糶為糧然火照積以事潁川雖流離造次其故家遺風不衰平時三年而潁川亦卒叅議與張夫人嫂也事之如規措潁川先君叅某軍中或自軍所來橐之一錢尺帛不有之私室必歸兄嫂先君求得奉職二孤女民間夫人子過所生歸諸令門元凱生有三年不為天

所恤以歲丁未四月四日卒年三十四葬之巖山先塋亦賴天之靈獲託其遺體者今白首矣每悼夫人棄世之早前先君二十四年先君後躋位光顯不及同其祿而元凱之士則濡先君休澤者祿養滋不及矣今惟有表章德美于是金石以慰靈下泉開示子孫于方來者猶或及焉敢屬筆子燧曰吾姚氏與陳同姓也燧之曾祖妣亦李金吾諸孫不知于夫人姑歟又戚屬也此燧不敢以不文為讓者勸農使諱膺夫人二子元凱元英

英殤孫坤女孫二人皆有歸矣銘曰

良農于穡天勤其力或報之秋秩秩夫人來殯于陳百
罹艱優君子中道弗偕其老年復不脩何天陰隲嗇施
淑德貽子是酬持斧繡裳風紀四方民瘼之瘳為時聞
臣人賢其賑誰異其謀壽母之子名不世齒泯泯堪羞
剗首之碣有美枚列以表阡丘

牧庵集卷二十四

欽定四庫全書

牧庵集卷二十五

元 姚燧 撰

墳道碑

贈少中大夫輕車都尉渤海郡侯解公墳道碑

至元三年武宗若曰內外庶官五品而上既皆宣授于
其子孫亦光顯矣而其祖考猶或布衣歲時廟享工祝
致告無所稱謂非所以興孝天下也乃敕省臣列五爵

三土加階勲而等威之五品子男從男正子者縣四品
郡伯皆惟考一代三品郡侯父及祖二代一品國公祖
而上通衰之至曾為極焉惟褒詞用御前寶者以其名
開他如宣授用是少中大夫秘書監丞解節亨之考禧
贈少中大夫輕車都尉渤海郡侯妣樊渤海郡太夫人
祖政祥中順大夫上騎都尉渤海郡伯祖妣樊渤海郡
太君節享將昭聖代禮使臣下之美且侈吾家千載希
闊之遇樹碑先將託筆于燧因惟前古不及三品者不

以封謚揆今為制下及五命至德深仁為何如哉揚厲
張皇史臣義為解故解氏略其遠紹惟始上世諱元家
真定者有子十有二人高祖諱徹登金進士第五子曾
祖其季諱信當金末世為真定綾錦院長官娶安氏實
生中順安卒繼娶密氏國初徙所領織工將度漠道卒
野馬川中順事繼妣以孝間讀書力學強敏兼入港貫
經史尤邃易學傍及天文歷法靡不精究金棄河朔全
趙已為元有會武仙殺都元帥史天倪以城叛而臣金

由太君為高苑金武義將軍女霖之女遂避地高苑歲
戊戌太宗詔試多士中是選者復其家中順以易義登
第卒年八十三肇瑩殯之渤海安豐鄉之東原太君卒
年九十四曾祖死遠後柩不得歸別製衣冠呼其鬼合
曾妣考妣兩世皆寔是焉二子祿及少中惟少中樊出
誠篤而多學為軒岐言是邦疾者特為司命擇師教子
恬忽時崇歲荒則發庾贍飢凶喪急貧無待見告賻而
周之則吾所儲如彼外府少不留吝稱貸遲歸火券罷

償部使者經郡觀省民俗必以其事上聞其章不許堂
帖有司大書其門旌曰義士詞垣之臣賦詩交詠凡是
鄉閭無間嘗飲惠與否爭進饋賀其日免織工取直未
入綾餘五百匹至大之元冬十月二十有七嘗不病而
卒年八十一妣郡太夫人亦樊氏金行部員外郎之女
常從母受學故于經史及列女傳皆嘗誦習且善書歸
子解氏賢淑有間舅姑姻戚稱其孝睦亦以至太之元
冬十一月二十日卒二子節亨筮仕為工曹吏出為濟

錄事叅軍杖其豪右使酒公所者于市由是惡少欽迹
再轉德州判官大新廟學以振風教移獄疑囚凡有司
積歲不能正其罪者皆檄獄之合前為錄事聽審得情
使誣詆者不得脫死無辜者賴以伸雪無慮引連數百
人事有今太子少傅李謙德州學記郡文學所紀部使
者之章可稽焉擢光祿寺主事集賢院都事祕書監著
作即今進而丞秩躋三品又降恤詔推恩二代下及墟
墓其子孝子慈孫責已塞矣撫謙提領濟寧益都屯田

以親年下無兼侍辭不赴三女長適和州萬宣次適
同知膠州姜陽李適太常少卿王景元男孫六儼侍儀
舍人儀國學生四未名女孫六長適般陽學正麟王餘
姆銘曰

生烜其名隨死而泯猶于柳車曾未旋軫一世鼎鼎幸
趨者多思所致然夫豈在他由積無素功微德薄譬破
潢潦其盈易泄惟義士君詩禮青蘊術已惠人矧財善
捐篤生孝子家學弗畔一為集賢兩東觀用是宸楓進

官少中推恩其先俾貴與同又爵之侯土以渤海子祖少施惟土未改中順伯之兩妣皆樊太君夫人貴及墓門平生侯伯精多用物安知斯時不己肉骨矧茲秘丞臚仕日躋爾伯侯進爵會齊安定東原萬家可置戶以守之用華百世

磁州滏陽高氏墳道碑

有國之所以寵臣下者二曰爵曰錫爵自九品推而上之至一而極雖有策制敕授等威其歸皆億萬維臣之

同若夫錫也億萬臣中無有百十之見及者人臣得一已幸矣况于三乎在易師象以三錫命為懷萬邦今江浙行省郎中高謙昔都中書左司事錫象笏禮曹郎中錫貂祛袖狐裘中書左司員外置錫白金百兩金竒服三寶三錫矣古所以懷萬邦者集其一身則天子之加禮以使者何如宜謙丐燧大書先桓上以嘉君命之辱下起以本父教之忠也維高氏自汾之孝義徙磁之滏陽則紬其曾祖府君有官勲于金喪亂失之祖府君諱

閔夫人張氏考府君諱澤字雲卿金既播汴太祖徇地
河北人能以州縣下者即以為守令僚屬聽自置罪得
專殺磁守杜國用知府君吏能求以自佐推澤為孔目
官俾司其州岸獄招求散亡之民大兵之餘市虎田萊
驅而翦之以立公宇四境戶叛僅及千數他州之民聞
磁懷輯有譽多來居他州虞捐戶數欲徙還之不得遣
追胥即徵徭賦士壬天下大料民戶歲入銀四兩民已
無所于得州縣迫征不休回鶻利之為券出母錢代輸

歲責倍償不足則易子為母不能十年闔郡委積數盈
百萬今長逃債多委印去時開尚書省于燕府君頻每
以二者為控曰今天下一家無有此疆界民之錯君爾
從土斷又百穀桑麻衣食之源歲鱗取之為利無窮古
有天下者悉驅游惰之民盡力南畝今釋是而戶賦入
之銀且產銀之所四海無幾必深山遠谷鑿遂篝火畚
礮鼓治而得焉可以盡給四海賦民之求哉若是不已
時日消月削窮益滋甚省雖是其說竟以法制立矣皆

不得其要領而還中統詔下而負銀始華州遷滄陽令
府君曰孔目州佐也他今由吾銓今乃與是班乎薄不
欲為後朝廷誅東反虜懲世官樊守令之選收歸吏曹
而易其地前為令者悉以令遷府君惟自州佐監武安
衛輝軍曹酒稅衛輝軍曹加提領或咎昔不為令府君
則曰命實使然我自棄之又將誰尤天今界予征商不
剝下媚上道及民矣安為而不卑之及謙入官來前飭
曰吾所以屑俯首者待汝用世也最夫吾宗吾不仕矣

以至元甲申夏五二日卒年六十一葬某里夫人劉氏
以賢淑聞二子長某早世謙始為彰德路總管府判官
入為工部員外郎轉都左司事禮曹郎中右司員外郎
出尹開州兼諸軍鄂囉遷江浙行省郎中改淮東宣慰
副使江西行省郎中再為浙江行省郎固亦足顯其中
親况稽近古父位不充而子或過耀固家不欲子孫貴
臨祖考故視子孫今何官勲生封而死贈之使貴與之
夷興孝勸忠聖元既法行之加郡國公侯于某將相之

家亦他日求推恩之凡也州佐比古上士道可謂未盡行其時矣而先有是仁民之策于庭臣欲紓其急其蘊豈淺淺哉而天嗇是享于其生其留豐報諸其死俾哀榮及廟墓者匪資謙責也從而銘曰

覆一簣以基崑崙之臺溉由藥以須負棟之材此常人之情皆亦蹶蹶其艱哉孰曰昌歿後來為濟時之才弁冕崔嵬而非先德之階豈羈於人而天之諧歟必百世滄水隈有由斯銘而伊人之懷者矣

靈山先生董君實墳道碑

嘉議大夫昭江路總管內勸農事董章將勒石甄表其
考府君靈山之墓持太平郡文學姚和中事狀丐銘于
燧因惟萬物本乎天人本乎祖稽漢金石惟祖始不可
推采者則不本之苟可推采無泯泯而不本者故祝睦
緒高辛火正祝融度尚與顓頊世掌位統國法度衡方
唐扶之胃堯陳球袁良之苗舜孔耽殷烈蔡湛文葉諸
君是後神明者可殫紀耶然是推采雖精博之士遠據

為說猶啓後人牽傳之惑若春秋傳蔡墨對魏獻子龍
問曰颺叔安裔予實甚好龍能求其嗜欲飲食龍多歸
之乃擾畜龍以服事帝舜賜姓曰董春秋外傳以蕪顧
溫董為己姓之族蓋黃帝二十五姬酉祁已滕歲任荀
僖信嫫伊惟青陽與夷鼓同己姓則董父非止裔子颺
叔安為黃帝裔孫者又較著也在夏殷世天獻無傲周
則晉良史狐安于秦將翳漢江都王相仲舒實生廣川
其地則今真定屬郡冀之棗強故是姓在趙者多宗之

或曰今居真定天祿坊者猶其遺苗君諱珪字君實曾
祖明善祖好義考信家真定屬縣靈壽其離析天祿固
未天遠至君業儒以江都罷黜百家表章六經使道林
有統為羣儒首嘗著玉杯繁露發春秋微曰吾家學也
遂專經春秋當授室鄉先生宗訥奇其願立女焉事考
府君妣夫人色養無違有純孝譽味道自腴恬忽勢利
不苟上交所親與者繞兩張公安撫芸太參鵬舉殊篤
其敬使則廬違遠則書候其安又善植產積則散周其

鄉歲荒為糜以全餓人加饋癯老以肉逮三子章奇彦
生曰吾以三人為衆吾家四世惟一其傳積德余在有
是衆子延師私塾務知修己治人之要以篤其成才不
事記覽為詞章誇述時好既其入官惟飭三事曰忠以
事上清以約己仁以裕民古之人未有捨是而名昭于
時者晚愛靈山暇與親友縱遊曰是荀卿子所謂秦剡
趙有苓及松栢之塞者後與封龍無極三公白右其一
則余忘之為六名山皆吾郡之望太常給珍幣祠其得

法食者今其文曠隆吾與二三子屬觴乎此亦可為千古一慨者故人號之靈山先生以至元二十有三年丙戌春三月十有一日卒年至六十九其月十有六日葬某地以前卒宗夫人祔繼娶孫氏章由卑官積至太平路總管遷總管平江戶甲天下賦重而役繁民頑弗率前政往往以不職罪去及章來為出令化之不專威虐而政以成績最浙西為良二千石斯克佩先訓之效也後移臨江至未再月以首疾去奇太原路交鈔庫使廩

司彥提領蘄州路稅課二女適百戶王某鄉人趙某自
章而下皆宗出男孫五汝霖主岳之臨湘簿汝柁提舉
大益山屯田汝海同知信州路事女孫五一適燕山劉
氏男魯孫十二人仲玉仲珍餘未名玄孫二人嗚呼後
靈山者四世已二十有四人入官不家食者四之一其
之而益蕃盛光大清顯者可知也已銘曰

維夫子士不全其卑或院窮家或顯庸世其顯庸世無
澤民加雖烜其時清議弗華其院窮家肥遜自遂道集

其躬令譽日致嗟之有苓伊爾廣川江都之宗實蔓以
緜具存遺編玉杯繁露千載茫茫誰究其緒君曰家學
吾舍焉師孝親之餘力振起之天爵篤修紛華若遺迨
子之任提耳三事曰忠事上清以自治仁能裕民則古
良史章也持循恪慎其身官二千石歷郡必聞有後如
斯亦既克述其來其思無贊爾續

神道碣

孫府君神道碣

少中大夫前同知荆湖北道宣慰使今福建行省郎中
孫顯自福州使人持其考盧川事狀六千里走書京師
謁銘神道于燧曰我孫氏故鄭管城力田人也族大且
滋紬兵興去平土即險而居始遷今河南之登封會歲
荒先人分族五百指輦祖妣就饒唐之比陽先祖猶留
祖妣卒其族以干戈未靖趨漢南先人死懷先塋生謀
思先祖借先妣挺身西北至則鄉邑蕭條先祖已無可
問其存歿矣寓食河之北數年復歸剪棘而田斬茅而

堂日夜作苦十年而能家也復崎嶇唐鄭之郊即遺龍
故老哀號百至以求先祖之柩竟負窆盧川篤孝如是
人有亡罪來歸寧抵冒法禁舍匿其家不忍聞知官也
事去則衣糧而遺之後有子朋顯益躬力穡不勞使之
以奪從師知學為吏晚歲號盧川老人與紫雲雲崑玉
溪輩年相夷者七人相從泉石間方顯通貴力可以足
旨甘適清溫而嚴霜交墜嗚呼命耶孤顯過以福省始
罷今開傳持其印甫畢襄事不得終喪而南固不為昊

天者弔矣重念先人為太早不遇之民行施于家而不
昭一時言及其鄉而不聞百里之外功微而用薄道晦
而居卑所以亟勒石者非以溢美誣世是求庶幾吾宗
遺苗知權與斯家之易雖明詔嘗有追封之文猶以例
未開不敢倡為之請以試不測之雷霆今幸賜銘非顯
生拜公嘉我光人亦將肉骨于九原也敢泣血請燧哀
其志且生永寧去登封三百均為河南屬縣為生同里
鄉少中宣慰荆湖某為憲為副官同義不可讓嘗究孫

氏先世由喪亂名字皆逸少中之祖伯季四人其作也
始徙登封者實生盧川君諱聚字某年八十五以至元
丙戌冬十月十日卒葬先塋以配元祖氏祔程有賢行
以君四十無子為娶姨母尹氏子而生明顯明讀書不
仕男孫七人碩將仕即峽州路知事復將仕即主枝江
簿亨謙豫節元咸幼女孫一人亦幼男曾孫六人未名
女曾孫四人逾幼嗚呼君夫婦惇然還登封及其屬續
三世子孫已且二十人其婚姻葛藟之家猶不居是選

固已行為盛門已微而昌始屯而亨天之禍人亦易矣
哉人少中涘民治軍遠跡嶺海蜚聲振績為時聞臣子
貴應銘法曰

凡今受姓咸出黃軒其自以氏實為公孫後有王孫別
胃王室文由便省去覆而隻有煜兩孫世緒咸遙欲一
其初循本自條其居登封由管城從鋒鎬逃歸孑然一
已胼胝手足克艱造家感迷先丘號邇遐求民欲天從
爰昭其孝指所在藏假人以造迺安斯窆廬店之阡為

子擇師斲材甌賢曰薄西山釋勤曰佚聞蘭釀松踐蒿
故實伊誰首之內翰馮公君誠未學異世樂同杖屨聯
翩榼壺攜載偃偃蒼蒼白首七輩富田連疇壽垂九齡
子孫官歸朱紫拜庭君可盡有人所願愛黃腸一棺無
恨于蓋送終隆敷孝子義為嵩高如拳始爛之碑

奉訓大夫知常德龍陽州孝子梁公神道碣

維梁氏世彰德安陽人金進士棟生偉皇府錄事生生
忠濟為東平嚴侯力能生殺人彰德時為屬城招不能

致足自自信不可威屈生君諱璩字文玉脩幹美鬢好
學篤古考府君卒廬于墓側晨夕悲號不異袒括手理
垣木鄉隣傷之衆佐其力終喪初事北安王再辟祿眷
密後從濟江以平宋勞官承務即尹湖之長興民俗生
女則教琴筑歌舞長利枝色事人貸歲滿則質他室取
生男謂無所于得率不鞠後棄諸水為撒曉曰若新國
也未知吾元為律倚市門子猶不敢棄况茲天民長賴
給上力役者不特傷汝父子之親亦乖聖世繁育生齒

之旨敢復然者論以違制由讀木蘭院碑載宋竇應丁
亥湖水大溢汎死數萬聚葬於此若京觀然遂盡傷心
罪前為令罹是大厄猶不為虞安必異時湖水不再至
耶發民築防延數十里高表及丈日急其程如水朝夕
至者悅以使之民不怨勞竟工種柳雜木其上以捍衝
齧縣有李王祠百區皆非法食毀瓦木用新縣治廟取
學尤麗高敞加什其舊即其羨材倉廩府庫病坊通舍
無不改為居民行旅為之改觀效命義軍故皆鹽夫羣

行市中人無誰何一日椎釀甕眇酒翁目叱衙兵追捕或諫如是驟繩恐不利尹君曰吾奉天子命尹此土蒞此民安能坐視鼠子與尹爭長雄自為名哉盡收其黨二十餘輩杖之隣死自爾鄉民效尤夙號難令小裂公牒大殺兵吏者皆側足斂手無敢肆暴嘗裏糧紱印行田老父為具食發橐償直父問所紱為何曰吾今也紱縣印耳父出告其鄉民百數十人追及于行爭持酒炙遮留後至者觸器覆酒沅地酒主憤云令去必刃汝

觸者曰吾亦有刃報之君曰民以吾故相仇其咎在令
惶駭罪其失言二人慚伏君為曉曰吾元禁挾方矢持
刃梨巖甚輕杖重死若曹何苦干禁挾此為耶且戍兵
以索此為名得之則破汝產其皆納置令所乃得兵數
千事而還後衙兵暮夜追呼民燭令署畫刻而至訟牒
至前決以其日未嘗潔囚圍土屢空去之曰士民號送
填道擁馬既久猶思求頌其德刻石縣門後令不可民
請不置者數年一監縣者曰梁令非有惠民何能致然

從汝樹石公堂右方書令歲陽歲名以彰其賢且俾人
灼吾不昧善也至元二十四年丁亥去寶應實一甲子
湖大溢水不冒防纜二尺民始歎曰微梁令葬魚腹矣
雖求為魚得乎加承直福建勸農營田副使巡行建寧
時羣盜聚浦城戍將方加兵君止之請身至其棚曉曰
汝皆平民逃州縣重賦繁役出此甚不得已之策汝曹
自計甲兵堅利儲餽有繼訓練有素徵發日多孰與官
軍而乃以就盡斃聚鳥散之人抗之不敵明矣能從吾

言捨險即夷相率而歸小可以徵賞大可以得官孰與
聞官軍身膏草野妻子奴人乎因血指為盟民感泣投
戈拜賜不煩兵而附順者若干人後議事福建省會
南劔俘賊妻孥三百餘人至公曰是多平民為賊驅脅
宜旌別之縱歸者半尋遷福建都轉運副使丁妣夫人
憂又廬墓終喪升秦訓大夫知常德龍陽州民間有惠
長興爭境逆而逞其來方大施張以變前習數月代至
民復境送而速其去大德四年為子鎮畢婚南劔夏六

月十一日卒歸葬其鄉先塋夫人同郡李氏二子伯也
鉅有學行二女已從同郡趙某許昌程某二孫浩浦至
大己酉有司上群從共居族子亦能喪親如君詩曰教
海爾子式毅似之宜特旌異風勵四方庭臣用嘉揭諸
大遼為孝義坊過者式焉鎮恐先德猶未白世聞燧舟
應官賓之招自淮安逆至儀真拜而請曰先君墓碑未
敢遽言俟他日必即京師見懇今而果來為之詩曰
聞古有訓孝子之至不于養生于喪自致敦古如君未

忍其親玄宅長還曠野無隣卽丘墓室僅蔽雨日呱呱
三年志盪與櫛家本之身克爾親親推以為國何有仁
民長與孩乳脫不寃天患防悍馴庶弊皆禱于福營田
幼農是官往造賊巢柔暴舌殘雖生平為蓋棺廼定不
有太史孰筆卓行瀾瀾清漳源出太行有碣其壖沆芳
與長

武略將軍知秦州史君神道碣

至元十有六年其歲己卯五月二十有一日武畧將軍

知秦州史君卒後二十二年夫人亦卒又後是十有一
年至大辛亥其子興平令誠三千里馳書京師于燧曰
昔太傅魏國文正許公私淑于秦我先人時童子北面
事之君年先立于下風今將舉是二喪別塋于長勝坊
少陵原樹碣墳道昭示悠長銘捨先友其將誰託余勤
其請之遠為序曰維史氏雲中人太祖加兵中國馮牙
始此故考府君廣隸師王穆呼哩戲下以從殘河朔河
東功成鎮西州金甌國播汴棄閩輔從其民于河之南

乃偕田侯雄踰西河雄取京兆府君遂盜華州芟荆祀
飯遶稗以立官舍又歲從太師塔爾海伐蜀功授璽書
金符即知華州有子八人君其嫡長諱克恭字子敬者
皆先師所命年十有八府君丐老遂襲為州惟騎射精
妙得其家學他皆戛去純綺豪習遇其聯任不以刺州
自多而克下之華之父老故人咸語曰吾邦君有子能
爾其所加禮不以年少而後其父會罷世侯遷刺同州
接壤華人信已素滿秋剌乾土廣而戶寡不虛旬浹以

當甘涼諸侯王妃主吐蕃去來驛塗比供億不失幸未
速矣實艱實棘勵志州校割俸為倡創新廟學後刺葭
州葭瀕西河方攝延安路事咎順寇成都盡發路民為
兵以戍君汰貧弱惟抽富民產沃丁衆者籍之輿誦曰
平戎秦藩肇建方冬發萬人築白海行邸君營五原寨
涇寒甚于他州方是之時急其程作民民必稿死君輟
徵集須春赴功其不苛民媚事形勢如此移刺秦州未
上而卒纔三十有五嗚呼不年哉天帝淵龍自輝驛致

先師至秦寶歲甲寅君從學八寒暑先師嘗譽其原重
篤勤有入道資由己未還鄉河內故不卒業而早宦所
就已此夫人瓜爾住氏金遼東行省博勒卓之孫皇先
鋒使色埒之女當君之卒年猶盛也三子誠弟謙以門
功主同官簿讓不祿觀三子成立若是豈不為善持家
學之徵歟女孫三姆銘曰

繫君先公興龍之選拔民于雲樹勲先功初亦豈易奮
父顏行政壘畧地大河之陽由晉而西移軍弘農乃剪

寇攘有華四封何以寵嘉有煒金卽副之命書郡侯是
列君襲為州猶小子侯會華世官循年轉汎遷之馮翊
興華壤錯吏習民安坐嘯畫諾于乾于葭乾難葭尤乾
止倏還葭多隱憂隱憂如何籍兵戍蜀與披秦藩行邸
迫築乃恤民寒緩程須春年不三紀未上卒秦司月旦
者評有二悼一不終業魏國去蚤一官止西雖曰邇家
有施不幸神都去遐不峻其階終始州刺豈天嗇之將
爾嗣少陵之原實古上林碣以表阡庸告來今

太倉監趙君神道碣

燧讀廣平府教張宏狀其弟子今奉議大夫僉嶺北湖南道肅政廉訪司事趙勵之考太倉監君之行而取其三焉曰學約而醇官久而卑操窮而確蓋書以乘治忽詩以正性情易以際入天而春秋以謹名分著懲勸其刪定繫作雖一出仲尼之手以請賢弟之問聖師之對示萬世以操存涵養為傳心之要典者惟論語為然而君誦之終身不治他經雖不治他經以推治他經譬則

破竹將無有迎任而不解其節者豈若今務博者童子
知誦六經白首猶迷其源委君亦漢氏諸儒專門一經
顧多成才之亞歟故出而仕其卑則監倉夫積久而易
糠腐者惟粟必贏其入而培其出贏其入也則輸粟之
家病培其出也廩之家伎之或一有言皆觸禁者矧利
所在覲得者衆臨制之吏鈎名綜實不予書則于使鱗
比取之月異而歲新焉幸有慎者已不為盜人則迫使
必盜故完往而敗歸絮入而汗出償產傭孥者武敏接


也此監府縣倉者然也太倉則儲幅隕之粟于斯其糠
腐尤夥尤夥則贏入而糶出者愈無紀極地由適輦穀
則病而忤者易愬易愬則完往而敗歸絮入而汗出愈
速或一二歲為之不償產傭孳者有之必無二十年之
久而不蹈者非不循俗屨己以拒人察察醇白者疇克
爾然亦确确乎其艱哉或疑是非德之大不曰鄭國之
大不曰鄭國之渠鑿涇注填闕者水也井亦水也以此
溉也井之利累日夜有不能終畝而鄭渠歲灌馮鹵四

萬餘頃夫不計井之勞與所居之小之異而責其不為
鄭渠世鮮不以為廷使日夜汲之積二十年之久冽而
不竭亦佳井哉監倉古委吏比也仲尼之聖猶止于當
會計讀語而學仲尼者能是已矣非德歟既其歸也有
廬于城而無田于野無臧獲以服事朝夕供井舅之勞
薪糧之須諸子身之衣惡食菲安不怨尤里之豪悍有
耻其乏者曰使幸交我則周之君曰吾受德鄭暴以
捐吾介不可及子勵仕常從之官每飭之曰世固有羞

賤貧而希富貴權俸以死無回者矣莫不一敗瓦裂汝
惟義命之安祿入之外不可他勞殊髮以賤其心能謹
其事而忠于上則良子也七十九卒猶以是為頌言寶
至元甲申四月十有一日也君諱珪字君璋世居盧龍
范陽間四世祖通以材武得官于遼為千夫長祖達不
仕考托監酒上蔡義宗播蔡死蔡亂君踰河僑家洺州
將成候兵曹後入監太倉洺今易為廣平為府元配河
南胡氏前卒三十二年三子或德安勵金無經學吾元

狗地漢上得江漢先生趙後于雲夢至熟而經生始集
或從之遊有善學譽與耆宿友年二十四德安年四十
皆前卒一女適肥鄉蓋氏再配東海盧氏前卒二十年
男孫某年二十五而卒女孫一適同郡輕氏一適巴圖
總管子毛頽孫曾孫一人未名勵自知淮東憲事入掾
中臺又掾中書出同晉州雲南行御史臺都事今為湖
南至所治善怡其先訓者大德戊戌將故墓君與兩夫
人于其鄉里求燧銘墓碣銘曰

生輝百輝歿淹其升熟曰嗣人克善乘承幽光于生蓋
棺益糴非子式顯歸以何道嗟太倉君怙養廉貧其志
不越式是後人入循周行出而要荒繡衣所如梟狐道
藏期為良子可曰不負令甲聽為于親可後易桓為碣
泔水之阡太史繫詩何永不傳



牧庵集卷二十五